



Tir Yimiyim

www.tiryimiyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimiyim@gmail.com

TAPAK 7

Yangia anidakangma :

f Tir Yimiyim

Instagram tiryimiyim@aolima

YouTube tir yimiyim

TAPAK 10

India nung Covid agi shiranger lakh 9-i oxygen agidar

Rishabh-i 'Hemkunt Foundation' nung tenlatsü



VOL. XVIII NO. 204 (ADOK 204) DIMAPUR

AMUNGNÜ (SUNDAY)

MONUPII (MAY) 09, 2021

₹ 5.00

NE state balala nung COVID-19 azüoktsü meranger

Guwahati, May 8, 2021 (Agencies): Northeast state balala nung sorkartemi pei pei state nung COVID-19 azüoktsü atema teinyaktsütem latettsüogo.

ARUNACHAL PRADESH
Hokolbarnü Arunachal Pradesh sorkari May 10 nungi anogo tenet atema Itanagar Capital Region (ICR) nung lockdown alitsü osang metetdaksüogo.

ASSAM
Assam nung lockdown osang mesangoktsü saka tenokdangba tasentem den night curfew alitsü osang metetdaksüogo.

Assam nung nikongdang 2:00 ako tashi nung dokan aser office ajak shibangtsü aser aonung 6:00 ako nungi anepdang 5:00 ako tashi night curfew alitsü ozüing agüja lir.

MANIPUR
Manipur sorkari May 8 nungi May 17 tashi district 7 nung curfew alitsü ozüing agütsüogo.

State kübok tesem ajak nung aonung 7:00 ako nungi anepdang 5:00 ako tashi night curfew ozüing agüja lir.

MEGHALAYA
Honibarnü sorkari East Khasi Hills district nung May 17 anepdang 5:00 ako tashi lockdown alitsü ozüing agütsüogo.

Maneni, Hokolbar nungi tenzüker Hombar tashi aonung 10:00 ako nungi anepdang 5:00

ako tashi weekend lockdown alitsü metetdaksüogo.

"Onoki tensa angateta lir saka asüing tashi matatsü aser nisung takümtem kümzüksüla. Aremzükangma. COVID strain tasen ya kanga tashitait. Nüingdak dang süra onoki mapa tesashiba inyaktüsü" ta tanü Deputy Chief Minister Prestone Tynsong-i metetdaksüogo.

MIZORAM
May 10 nungi tenzüker anogo 7 lockdown asütsü atema sorkari metetdaksüogo.

May 10 anepdang 4:00 ako nungi tenzüker May 17 anepdang 4:00 ako tashi Mizoram nung complete lockdown ozüing agütsüogo.

SIKKIM
May 6 nungi May 16 tashi sorkari night curfew aser tenokdangbatem agütsüogo.

Nija aser sorkar garitem inter-district senzüsenbongba noktanger aser shishilembartemi anepdang 10:00 ako nungi nikongdang 4:00 ako tashi dang lapoktsü tetuyuba agütsüogo.

TRIPURA
State sorkari local & urban bodies aser nagar panchayat tesem ajak nung night curfew ozüing agütsüogo.

Tripura chief secretary, Manoj Kumar-i May 4 nungi tenzüker night curfew alitsü tetuyuba agütsü.

DRDO-i anti-COVID-19 mozü ka yangluogo

New Delhi, May 8, 2021 (Agencies): Defence Research and Development Organisation (DRDO)-i anti-COVID-19 oral drug ka yanglutetogo aser ibaji rongdak nüingdang amshitsü atema Drugs Controller General of India (DCGI)-i temelaba agütsüogo.

DRDO-i yangluba mozüji sachet ka nung powder form nung lir aser tzü nung meyokteper ajemer. DRDO lab aser Hyderabad nung amenoka

aliba Dr Reddy's Laboratories (2-DG) ajanga Covid anema drug 2-deoxy-D-glucose yanglutet.

Yaküm May aser October tsüingda iba mozü tanabuba shilem atema tendangdang COVID-19 agi shirangertem taneptsü anguba bushiteta liasü. Iba mozü ya COVID019 agi shiranger nisung 110 dak tendanga liasü.

Maneni, iba mozü ya India kübok mozü ki 6 nung tasembuba shilem atema tendanga liasü.

COVID-19 positive test report mali nunga mozü kidang anioktsü: HM

New Delhi, May 8, 2021 (Agencies): Coronavirus agi shiranger asütsü akok ta temolung melemi bilemba nisung ka Covid-19 facility nung anepalutsü atema positive test report menüingdaksü ta Honibarnü Centre-i metetdaksüogo.

India nung novel coronavirus agi nisung aika shirangba mapang ka nung Centre-i Honibarnü COVID-19 agi shirangertem mozü kidang aniokba indang policy guidelines reprangshimogo aser itemji anogo asem tsüingda mapa küma inyaktüsü tetuyuba agütsüogo.

"Iba ya COVID-19 agi shirangertem jungjunga anepalutsü atema inyakyim ka lir" ta Centre-i metetdaksü.

Centre-i state aser UT sorkartem, Centre, State sorkar and Union Territory kübok mozü ki ajak aser nija mozü kitem dangi tsüinglangen agüja aliba tetuyubatem yokogo.

* COVID health facility ka nung anepalutsü atema COVID-19 virus indang positive test report mali nunga kecha masü. COVID-19 agi shiranger ta temolung melemi bilemertem Covid Care Centre, Dedicated Covid Health Centre mesüra DHC nung temolung melemi

COVID-19 Nagaland: Nisung timtiba dak putet; 15 asü

Kohima, May 8, 2021 (TYO): Honibarnü Nagaland nung nisung 333 dak COVID-19 putet aser iba ya taküm atema nisung timtiba dak putetba asütsü.

Tanü putetertem züingsema nisung ajak agi 15,913 kümogo aser nisung 137 süogo.

"Tanü nisung 333 dak COVID-19 aliba putet. Parnokji Dimapur nung 204, Kohima nung 116, Mokokchung nung 6, Mon nung 4 aser Tuensang, Peren o Longleng nung kaka (1) lir. Külen nisung 19 taneptsü angu. Parnokji Dimapur nung 14, Kohima nung 4 aser Mokokchung nung 1 lir" ta Health & Family Welfare Minister, S Pangnyu Phom-i metetdaksü.

Nisung 15,913 rongnungi 12,559 taneptsü nguogo aser

tang nisung 2,711 anepaludar, ta paisa ashi.

"Nagaland nung COVID-19 agi shiranger taneptsü angubaji 78.92% dang kümogo" ta State Nodal Officer, IDSP, Dr Nyanthung Kikon-ia ashi.

"Tanü COVID-19 agi shiranger nisung 15 asüba züingsema tasür ajak agi 137 kümogo. Tanü Dimapur nung nisung 14 aser Zunheboto nung 1 asü. Ajüsüaka, tasürtem rongnung parnok 10 bo tanga timtem ajanga asü" ta paisa metetdaksü.

Nagaland nung COVID-19 puteter nisung 506 tashi tanga state temi ogo, ta Dr Kikon-isa shisem.

Nagaland nung COVID-19 alitsü akok ta temolung melemi bilemba sample 1,63,892

tendangogo. RT-PCR ajanga 80,943, TrueNat ajanga 50,124 aser Rapid Antigen Test ajanga 32,825 tendang, ta paisa ashi.

Honibar tashi nung Nagaland nung nisung 1,77,040 nem COVID-19 vaccine indang dose 2,25,285 agütsüogo, ta State Immunization Officer Dr Ritu Thurr

Vaccine agirtem rongnung frontline workers 51,690, healthcare workers 14,992 aser arishi küm 45 ser tempur 1,10,358 lir, ta paisa ashi.

"Nagaland nung nisung 48,245-i vaccine indang dose anaprong agiogo. Parnokji front-line workers 26,483, healthcare workers 9,970 aser arishi küm 45 ser tempur 11,792 lir" ta Dr Thurr-isa metetdaksü.

Nagaland nung oxygen cylinders peria dang lir

Kohima, May 8, 2021 (TYO): Nagaland nung COVID-19 agi shirangertem asoshi oxygen peria dang lir aser tensa tamajungba ajuru nunga renema lir, ta Health & Family Welfare Department Joint Director, Dr Neisakho Kere-i ashi.

Nagaland nung Type B Cylinders (smaller) 1,617 aser Type D cylinders (bigger) 402 lir, ta Dr Kere-i ashi.

"District ajak nung oxygen lir

amshiteter aser kanga shirangertem asoshi type D aser B amshir," ta paisa ashi.

Nagaland nung tang COVID-19 puteta anepalur timbaka terara dang shiranger aser kanga shirangertem aika mali, ta paisa shisem.

"District ajak nem lema agütsüba sülen department ket nung B type 58 aser D type 56 oxygen cylinder lir. Iba dak alia PM Cares ajanga agütsüba

oxygen peria dang yanglutettsü, ta paisa ashi.

State nung oxygen generation plants aika akümba agi type D cylinders 1200 aser type B 800 asüingdangogo. Type D cylinders ji district hospital aser CHC kar nung enoktsü aser oxygen pipes ajanga ward nung shirangertem nem oxygen agütsütettsü, ta H&FW Dept. Joint Director-isa metetdaksü.

Külen, B type cylinders ji CHC

District balala nung oxygen cylinders aliba:

Cylinder Type	Dmp	Kma	Mon	Mkg	Lnlg	Prn	Phek	Tsg	Kip	Wkh	Zbto	Nok	Others
B	346	342	168	155	47	53	101	121	80	58	42	30	16
D	146	77	12	18	5	6	13	26	11	12	6	13	1

aser ano oxygen concentrator 250 tashi district ajak nem lema agütsüogo. Concentrator nung oxygen cylinders menüingdaker kechiyong iba machine-i oxygen agütsür aser ibaji indangindanga shiranger nem agütsüteter. COVID-19 agi tera shirangertem atema oxygen concentrator

Pressure Swing Adsorption (PSA) oxygen generation plants Kohima, Dimapur aser Mokokchung nung amenoktsü" ta Dr Kere-isa ashi.

PMCARES kübok agütsüba PSA oxygen generation plants ji Kohima nung 300 litres per minute (lpm) production capacity aser Dimapur o Mokokchung nung 200 lpm capacity lir, ta paisa metetdaksü.

Tanga district tem nunga oxygen plants atema maparen tenzükogo aser Longleng, Mon, Tuensang o Phek nungbo oxygen plant atema ki yanglu tenzükogo, ta Dr Kere-isa ashi.

UNDP kübok Tuensang aser Phek nung 150 lpm plants yanglutsü aser tanüingba district tem nung Unicef nungi 100-150 lpm yanglutsü. Ano, Wokha aser Kiphire nung 90 lpm capacity plants yanglutsü, ta paisa metetdaksü.

India sorkari Kohima aser Dimapur atema 1000 lpm capacity plant ana agütsütsü akok. Iba ajanga Nagaland nung

aser PHC down nungi sub-centres nung amshitettsü, ta paisa ashi.

Oxygen cylinders B aser D Types dak alia state sorkari Centre dang oxygen concentrators 800 meshiogo aser itemji yakta angutsü, ta paisa shisem.

Chief Minister Neiphiu Rio, Health Minister S Pangnyu Phom aser ketdangsurtemi mapa tajung inyakba ajanga Nagaland nung oxygen peria dang lir, ta Dr Kere-isa ashi.

"Naga Hospital Authority Kohima nung PSA Oxygen Generation Plant taonung tendangtsü aser oxygen sample bendener tanga yimti kati bener oa tendangtsü" ta paisa metetdaksü.

"Dimapur nung PSA plant maparen tenzükogo aser ibaji tembangba sülen Mokokchung plant atema mapa tenzüksü. Taküm May ita tatemlen tashi nung tanüingba district ajak nung oxygen plants amenoktsü imlar" ta Dr Kere-isa metetdaksü.

(Maneni tapak 10 nung...)



World Red Cross Day amungba anogo Indian Red Cross Society(IRCS) Kohima District Branch-i Meriema nung Good Samaritan Old Age Home semdanga liasü. World Red Cross Day ya may 8 nü Jean Henry Dunnant asoba anogo küm shia amunger, aser taküm iba anogo "Together we are unstoppable" omen nung ajemdaker mungogo. Good Samaritan Old Age Home semdangertem rongnung ketdangpurtem aser Kohima District Branch Managing Committee züngsemtem dena liasü. Parnoki tabentsü sü, mask, aonsotsü aser sen tera tenla agütsü.

Ex- Servicemen & Veer Naris tem atema Indian Army-i teyari renemtsür

Kohima, Monupii/May 8 (TYO): Linük ajunga Covid-19 wara agi lemtatsür aliba mapang Indian Army Northern Command-i, Ex- Servicemen aser Veer Naris tem anepalutsü aser medical tsütsü parnok nüngdakbatem peridaktsütsü atema scientific tsütsü aser sentong tatongi yangluogo. Tenüngdakba mapang item telok nem teyari agütsütsü atema jenjang balala agiogo.

Ex-servicemen aser parnok dak metaloker alir meyirejang 34 dak tema J&K aser Ladakh UT nung lidar. Parnok nem tashidak nungi jenboa alitsü atema

tangazükba agütsütsü asoshi jenjang agiba den facility tem anepalutsüogo. Maneni tashidak tendangtsü atema jenjang agiba den helpline numbers amenoktsüogo aser parnok anasa aliba Army Hospitals tem parnok asoshi lapoktsüogo. Helplines network amenokogo, parnok tenüngdakbatem jangjatsü atema nodal officers shimogo aser parnoki dangi call süa osang balala agütsüdar. Anogoshia nisung 250 shi den tongtepratepa jembidar.

Tang tashi nung Ex-servicemen 1878 nem vaccine mezüngbuba dose agütsüogo

asur nisung 137 nembo vaccine tanabuba dose agütsüogo. Kasa mapang nung parnok dak metaloker aliba nisung 1878 nem vaccine mezüngbuba dose aser 152 nem tanabuba dose agütsüogo.

Indian Army-i, Ex-servicemen aser parnok dak metaloker alirtem nem teyari agütsütsü atema awawa inyakdar aser iba den COVID-19 wara pokteter aliba mapang timtem tekangshi ajurubatem mesemtsü atema inyaka arudar, ta PRO (Def) Kohima sangdong ka ajanga metetdaksü.

ADC Pfutsero-i African Swine flu indang metetdaksü

Dimapur, Monupii/May 8 (TYO): Additional Deputy Commissioner Pfutsero-i sangdong ka ajanga Pfutsero Sub-Division nung aliba nüburtem dang Phek aser Kiphire districts nung African Swine Flu (ASF) pokteter aliba indang metetdaksüogo.

African Swine Flu (ASF) pokteter aliba dak sendakba nung Deputy Commissioner, Phek-i tetuyuba agütsüba dak ajemdaker ADC-i nüburtem dang kidang metsüa aliba ak masütsüyim agi asüba aser ak maziüokteti akümba ajangshira

Assistant Veterinary Surgeon, office Pfutsero nem osang agütsütsü metetdaksüogo.

Pfutsero Sub-Division nung iba tashidak menatepa aoba nokdangtsü aser aziüoka ayutsü atema nüburtem aser ak farm lapoka metsürtem nem tetuyuba kar agütsüogo.

1. Iba tashidak ya kanga kara menatepyonga aoba viral tashidak ka lir, aser iba tashidak aziüoktsü atema anepalutsü yimya kecha mali aser vaccine-a mali aser wara agi atongba ak ajak noklang nung noklang asütsü.

2. Tashidak nokdangtsü, aziüoktsü, asadangtsü aser bio-security inyakyim sülen anidakba ajanga dang iba tashidak ya samatsütettsü.

3. Village councils, nüburtem aser ak metsürtem-i ak asüba osang parnok anasatiba aliba veterinary health centre tem nem osang agütsütsüla.

Maneni osang ajanga ashiba agi, Assistant Veterinary Surgeon, Pfutsero-i tensa asadanga alitsü aser African Swine Flu prokshia aoba aziüoktsü aser nokdangtsü atema tangazükba balala agütsütsü.



Chuchuyimpang Baptist Arogo Pastor Rev. I. Wati Imsong-i May 8 nü Ongpangkong Kaketshir Mungdang (OKM) indang commercial building basement meshiteta lapoktsür külen OKM ketdangsurtem den külemi tangokba noksa nung angur. OKM commercial building ya highway nungi Imkongmeren Sports Complex-i aoba lenjem (Arkong Ward) nungto lir. Mokokchung, May 8, 2021.

Tizit nung ki ka shibangtsü

Dimapur, Monupii/May 8 (TYO): COVID-19 tashidak prokshia meyoktsü atema ADC Tizit, Pakon Phom NCS-i May 6 nü Tizit jila, Police Ward nung amenoker aliba N.H Hotel den atonga aliba Noklem'er (Neitong yimtsüng) ki osang tejangja ka magütsü tashi shibanga ayutsü atema tetuyuba agütsüogo.

Kasa sangdong ajangsa, tashidak prokshia aoba nokdangtsü atema jenjang balala agiba anema inyaksangshirtem, Disaster Management Act 2005, Sections 51 nungi 60 aser Indian Penal Code Section 188 den tanga temzüng ozüng dak ajemdaker merenshitsu, ta metetdaksüogo.

Security Forces-i NSCN (K2) züngsem ka apu

Dimapur, Monupii/May 8 (TYO): Police den longjemer Security Forces-i, May 6 nü Zunheboto jila kübok anogoshia shishilembadak tesem nung NSCN (K2) züngsem ka puogo.

Osang tejangja ka angazükba sülen State Police den longjemer Security Forces-i Zunheboto jila nung

shishilembadak meita aoba mapang NSCN (K2) züngsem ka apu. Pa ket nungi 7.65mm Pistol ka den magazine aser 7.65mm injang pongu nguteta liasü.

Ken o maneni bushitsügangtsü atema aija alisang den pa ket nungi ngutetba hadirtem Zunheboto Police Station nung bendanga agütsüogo.

Longleng nung coffee Pulper machines lemtsü



May 7 nü DPO, Office LRD Longleng nung nung Deputy Commissioner Longleng M.Shayung Phom, Sr. SP, beneficiaries aser tanga ketdangsertem coffee Pulper machine lemtsüba sentong nung shilem agiba noksa nung angur.

Dimapur, Monupii/May 8 (TYO): May 7 nü DPO, Office LRD Longleng nung Coffee bar lapokba sentong den repsema coffee Pulper machine lemtsüba sentong agiogo. Iba sentong nung Deputy Commissioner Longleng M.Shayung Phom alakteta jaoker liasü.

Sentong nung o jembiba mapang DC-i, district nung coffee bar tasen ka amenokba atema Land Resource department nem tenüngsang agütsü. Paisa, tang covid-19 wara pokteter aliba dak rangloker jembi aser nüburtem dang sorkari agütsür aliba SOPs guidelines sülen tashi angaa anidaktsü atema mepeshia metetdaksü.

District nung maparentem ajak anep anepa inyakyonga aotsü atema district administration, police aser Medical department tem inyaktüsü akümer ajisüaka yimtsüng aikati vaccine agütsüba mapang sorkar den teka amteper minyakker aser yimdaklir kar dang vaccine agir lir, ta pai ashi. Paisa, nisung ajaki aser aluyimertemi pei yimtsüng nung takok tashi vaccine takaratiba nung agitsü atema nüburtem nem tangazükba agütsütsü ajungshi.

Aluyimertem ajungshia DC-i, machine amshitsu mashiba ajanga tajangzük

agütsütsü melena takoksa-ang ajurutsü ta shia, aluyimertem dang memetetjemba kar danga lira department ketdangsurtem dang nungi angazüka amshitsu ajungshi.

Kasa mapang nung District Project Officer, LRD Longleng Kughalu Chichi-i, coffee tsünüba dak sendakba nung tanga northeast state tem dang nungi Nagaland tali tejakdangi or lir ta shia, aluyimertem dang coffee telong junga tsünütsü aser külem aluyimertem nem coffee tsünüba indang aser iba ajanga tajangzük agütsüba indang tangazükba agütsütsü ajungshi.

Maneni sentong nung o tatsüka jembiba mapang Executive secretary PBCA Tialemba-i, covid-19 wara pokteter aliba ajanga tensa melenshiogo, ta shia asenoki akokba yari tsünüsenpongtsü tem aser talisa coffee tsünüa alima nung tesem balalai dena yoktsüla aser asenok ya tachir dang masü saka adokdaksür akümtsüla ta ashi.

Sentong nung alakteta jaokeri Coffee bar lapoktsü aser DPO-i coffee pulper machines amshiba yimya sayu. Land Resources Department Longleng-i aluyimertem nem coffee Pulper machines 25 agütsüogo.

Sarma dang nungi Sonowal ang CM aginür: Survey



Guwahati, May 8, 2021

(Agencies): BJP-i Assam nung chief minister shibai inyaktsü'ar ano osang mesangoktsüi aliba mapang nung post-poll survey ka agiogo aser iba nung nübortemi finance minister Himanta Biswa Sarma dang nungibo tang teinyakdak CM Sarbananda Sonowal nem ang inyakdaksübüba bushitetogo.

May 2 nü Assam Assembly election 2021 indang results metetdaksü aser iba nung BJP-i aniba teloktepi menden 75 ngua takok angu, saka CM tasen aser pai aniba sorkar ano mekümtet lir.

Honibarnü Sonowal aser Sarma naprong Delhi nung central party lennirtem jaoka senden menogo.

Sonowal aser Sarma

naprongi chief minister inyaknür aser tenaprong chartered flight ka nung Delhi-i ao aser BJP president JP Nadda, Union home minister Amit Shah o general secretary BL Santhosh nung den senden menogo.

Senden amenba sülen minister Sarma-i "Deobarnü Guwahati nung BJP State Legislature Party senden nung osang jangjatsü" ta metetdaksü.

Sonowal aser Sarma na indang post-poll survey ka agiba nung nübortemi chief minister atema Himanta Biswa Sarma dang nungibo Sarbananda Sonowal ang aginür ta asüba metetogo.

Assam nung taruba CM shiba aginür ta asüngdangba nung telangzür pezüi (23%) Sonowal tenüng ashi.

Sonowal sülen tanabuba jenjang nung Congress lennir aser Koliabor MP Gaurav Gogoi 12% aser Sarma 11% aginüba bushitetogo.

Ajisüaka, Lokniti-CSDS-i 2016 election nung agiba survey den medemdangra Sonowal dang nungibo Sarma jenjang tajungba kümogo.

2016 küm nisung 30% shi kati Sonowal aser 4% shi kati Sarma aginüba bushiteta liasü.

Taküm survey nung Lower Assam nung nisung 16% ajanga Sarma aser 19% ajanga Sonowal aginüba bushitet.

Upper Assam nung nisung 28% ajanga Sonowal aser 6% ajanga Sarma aginür. Maneni, Barak Valley nunga 22% ajanga Sonowal aser 9% ajanga Sarma aginüba bushitetogo.

Mizoram deputy CM Tawnluia dak Covid-19 putet

Aizawl, May 8, 2021

(Agencies): Mizoram deputy chief minister aser Mizo National Front (MNF) senior vice president Tawnluia dak COVID-19 aliba putetogo.

Honibarnep pa dak Rapid Antigen Test ajanga Covid-19 putet.

Arishi küm 77 tain Tawnluia temang mejungi aküm aser iba ajanga pa home isolation nung liasü, ta ketdangsur kati ashi.

Zoramthanga-i aniba cabinet nung Tawnluia-isa public health engineering, urban

development & poverty alleviation, aser animal husbandry & veterinary mapatem ketdangsüa inyaker.

Pa ya taoba Mizo National Army (MNA) nung commander-in-chief liasü.

MNF lennir Tawnluia-i November 2018 assembly election nung Tuichang assembly constituency nungi takok angu.

Paisa 1987, 1989, 1998 aser 2003 assembly election tem nung takok ngua liasü aser 1998 aser 2008 tsüngda

kümsük anaben atema Mizoram home minister inyakogo.

Honibarnü Mizoram nung nisung 235 dak Covid-19 aliba putetogo aser parnok züngsema nisung ajak agi 7,382 kümogo.

Tang Mizoram nung nisung 1,906 anepaludar aser 5459 taneptsü nguogo.

State sorkari May 10 anepdang 4:00 ako nungi May 17 anepdang 4:00 ako tashi anogo tenetnü 'complete lockdown' asütsü osang metetdaksüogo.

Pradyot-i itasen ajunga tenlar

Agartala, May 8, 2021

(Agencies): TIPRA Motha tanishir Pradyot Bikram Manikya Deb Barma-i tanü nübortem asoshi aser talisa COVID wara anema inyakba nung amshitsü atema pa indang küm ka itasen ajunga tenlatsü osang metetdaksüogo.

"Nübortem ki yanglushitsü aser shisaliok bushiba nung aser talisa corona anema

inyakba nung amshitsü atema kü indang itasen ajunga tenlatsü telemtetba agiogo. Tripura Tribal Areas Autonomous District Council (TTAADC) sorkar ket nung terenlok atema senotsü peria mali aser iba atema kü itasen agütsübaji mapa tilatiba lir. Ni tangar danga mepishitsü" ta Deb Barma-i tanü metetdaksü.

Manipur district 7 nung curfew ozüng agütsür

Imphal, May 8, 2021

(Agencies): Manipur sorkari Honibar nungi district 7 nung curfew alitsü osang metetdaksüogo.

Iba ya COVID-19 virus azüoktsü atema lir aser May 17, 2021 tashi alitsü.

Curfew alitsüba district temji-Thoubal, Imphal West, Imphal East, Ukhrul, Bishnupur, Churachandpur aser Kakching lir.

State kübok tanüngba tesemtem nung aonung 7:00 ako nungi anepdang 5:00 ako tashi night curfew alitsü.

Ajisüaka, sorkari healthcare, essential services aser goods vehicles tenokdangba kübok medendaksür.

Hokolbarnü Manipur nung nisung timtiba dak COVID-19 aliba putetogo. Yashi nisung 600 dak puteta liasü.

Tripura Cabinet-i doctor 164 shimtsü telemtetba agiogo



Indian Air Force (IAF) indang AN-32 cargo plane ka Agartala nung aliba MBB Airport nung arua anenzükba sülen agiba noksa angur. Iba tayimtsü nung oxygen concentrator 60 bener aru aser iba ya United States-i India nem teyari agütsüba lir.

Agartala, May 8, 2021

(Agencies): Tripura Cabinet-i Tripura Public Service Commission (TPSC) ajanga rongdak nüngdakba nung ajemdaker doctor 164 shimoktsü atema telemtetba agiogo.

Covid19 wara tanabuba agi timtemba mapang Cabinet-i iba telemtetba agi. Tan ita recruitment process atema sangdong ka agütsütsü, ta Tripura education minister Ratan Lal Nath-i ashi.

"Covid19 agi shiranger anepaluba doctor (contract basis) nem 10 marks agütsütsü" ta Minister Nath

Doctor 305-i contractual basis nung inyaktsü atema shiditem agütsüogo. Tripura nung COVID-19 tensa reprangtsü atema doctor peria dang lir, ta paisa ashi.

State Cabinet-i Hokolbarnü senden nung Covid19 tensa atema jembiogo, ta Nath-isa shisem.

Tang Tripura nung MBBS doctor 118, homeopathic doctor 3 aser dentist (BDS) 27 mapa tazüngtem lir.

Tripura sorkar kübok MBBS doctor 997, homeopathic doctor

18, Ayurvedic doctor 42 aser dentist (BDS) 53 tashi tang teinyakdak lir.

Parnok dak alia National Health Mission (NHM) kübok Ayurvedic & homeopathic doctor 205, doctor (BDS) 48 aser MBBS doctor 5 lir.

"Tripura sorkari Covid19 tensa reprangtsü atema doctor peria alitsüla ta angatetogo. Cabinet-i Tripura Public Service Commission ajanga MBBS doctor 164 aniooktsü telemtetba agiogo" ta Education minister Nath-isa metetdaksü.

"Doctor tem shimokba tatidang nung API atema 100 marks aser interview atema 15 marks alitsü. Covid19 agi shiranger anepalur nem 10 marks talila agütsüsemtsü" ta paisa ashi.

Tawa tu Tripura sorkari Covid19 agi shirangertem anepalutsü atema contractual doctor 100 shimtsü telemtetba agia liasü aser atema tatembang anogoji May 10, 2021 asütsü.

"Tang tashi nung nisung 305-i shidi zülüogo. Parnok rongnung MBBS 35, Homeopathy 168, BDS 90 aser Ayurvedic doctor 12 dena lir" ta Nath-isa ashi.



Assam kübok Rupsi Airport nung Flybig tayimtsü arua anenzükdang tzü khalokja pela agizükba noksa angur. Dhubri district nung aliba Rupsi Airport nung küm 38 tashi tayimtsü mesenzüi aruba sülen Honibarnü Guwahati Airport nungi Guwahati-Rupsi-Kolkata tsüngda senzüba Flybig tayimtsü ka arua anenzüka iba airport lapokshio go ta Rupsi Airport authority-i metetdaksü. (Dhubri, May 8)



TIR YIMYIM

YIMOBILEM (EDITORIAL)

DIMAPUR AMONGNÜ, MONUPII (MAY) 09, 2021

Tzüratemdaksüba tetsü

Asenok asoshi Tsüngrem temeim sülenbo tetsü temeimsa tuluba, anungji iba temeim ya langka ka den medemdangtsübaji kanga tasak. Aji agi, Apijemtsü Shin tapu 31 tapu 10 nung tetemjen tetsür mesüra tetsü kaji kecha dena medemdangtsü makok, kechiyong la jenjangji senti berem dang nungia sentiba ta shia angur. Aji oda, medemdangdi süra, laji shidi bener rong (merchants' ship) mesük ta kasa tapu tekong 14 nungji shia angur. Ao Laishiba meyipertemi kanga junga meyipba lai tekongtem rongnung ya ka lir. Iba Lai tapu nung shia aliba tetsür ya Solomon chubai pa tetsü Bathsheba tenüngsanga ashiba amato ka angatetter. Koba lima nung shir südir süaka taginüba ajakbo pei alidak mangur, anungji tangalen nungi bushia bener arur. Solomon chuba mapang alima nung alirtem nungdak bushia bener arutsü atema gari aser tayimtsü mali asü saka tzüim ajanga rong agi dang alima ka nung kati, mapang talangka agia, kechisarina ajak bushia belena bener aru. Atangji, iba akhi putu mapanga rong tapu aika liasü. Item rongtem rongnung ango apur Yohan aser Peter nungertemi amshiba rong ama mesüra nisung mener jajaba Yona amenba rong ama liasü. Iba denji kangasa nungdak aser tongtibang rong kaji khu abenba rong liasü. Item khu abenba rongtem jagi nisungtem nungdak chiyongtsü aser osettsüsettem alima talang nungi shishia bener arur. Aji oda, Solomon chubai temeim aketba tetemsü tetsür mesüra tetsü ka den medemdangba rongji alima talang nungi khu tulu amena bener aruba rong, Merchants' Ship, liasü. Ao oshi nung rong tapu telemsa mali, anungji Laishiba meyipertem atema Merchants' Ship tetezü asen oshi nung meyiptsübaji kanga tasak ser alitsü. Ajisüaka, parnok terajem shisatsü agi Merchants' Ship tetezüji asen oshi nung parnoki 'shidi bener rong' ta meyip. Iba jagi aiben asenoki 'shidi bener rong' ta asübaji shiti (letter) bener rong (mail ship / mail boat) amai azünger aser angatetter. Iba kasa ojangji Arok osep nung 'shidebener' ta agüja angutsü aser iba zülumenjiang shitak amai olasüji adoker. Shide tetezüji Ao oshi nung kanga tulu mesüra aika ta angatetdi. Kodang jendang anung nung masem tsük bendendir, anungjiang agiena yur, jen jagi anung kümer, yangji dang tsük tokdener, iba dangji shide ta ajar. Ibaji asenok tsüraburtem asoshi rongsen tulu liasü, kechiyong akhidangbo tsük jen sünga tokdena ayuba dak alema takaba jenjang mali asü. Iba ama rongsen tulu len talang nungi timtem aika agia bener arua yaa tzüraseta aliba nübertem nem chiajemdaksüba aser agidaksüba khu abenba (shidebener) rongji tetsü temiemang mesüka ta Apijemtsü Shini ashir. Atangji, Solomon chubai shidebener rong den tetsü temeim medemdangtetbaji par putu nung kanga peta liasü. Tanü asübo UK , Israel aser US ama limatem nungi Covid mozü aser chiyongtsü dang masü saka oxygen dena India tonga bener arutsüba khu abenba tayimtsü (cargo plane) tulu ama den tetsü temeimi inyakba aser tzüratemdaksüba mapatemji medemdangla. Tetsü temeim yabo, Tsüngrem temeim amato, temeimsüka asüba purtem dang kisung meimba temeim masü. Atangji, temeimsüka topur tajung, temerük, tashi tanga, kodanga majeper aser kodanga mejashidaksür ta asüba nisung mesüra tanur dang meimbajibo shitakba temeim masü, kechiyong temeimsüka aliba purtemjibo temeim maketba nisungia meimtsü. Ajisüaka, shitakba temeimjibo temeimtsü maket, tashi manga, kanga sepleper, kidang kecha agia matir, chia ajem nung mazüok, aonung amui junga meyok nüken belemdaksür saka kenü anogobosa ozü jabaso, jala aser kinungbo ya melenshitsü ta teimla aser taremsük nung odang meima anepaluba temeimjiang temeim lir. Iba temeimji tetsü temeim lir. Asenok aikati aiben meteta aser memeteti tsürabur jashitsüsa aser tangar tsüngdang nümamedangtettsüsa maksü aser tamakok bener arur, ajisüaka ojalaibo idangjia ain madoker, tangar nem asen tajji nembanga metongloksür saka aremsük aser asung anogo tajung tasen ka Tsüngremi moatsütsü ta imlaseta sarasademer aser talang nungi asüyonga bener arua maka agi takar kümer lai asen nungdak peritsür. Lai asen majung indang jembiba manganür saka kodang asen indang tajung tilaka danga angashidir, lasa tepelaba. Lai tanüa asenok dang nungi kecha meimlar saka asen tajung kümra, aji la asoshi teperi. Asen tejashi, shisabolu aser nungdak ajak ashidak, meshitak aser tzüratema mulung anisungzük angudakji ojala lir. Atangji, iba ama tetsü ka temeimji kechi den medemdangtsü ? Ojala dang lai meimba temeim asoshi 'kanga pelar' ta kisung ashi agibo jangramatem. Ojalabo chubatsür Bathsheba dang nungi tasungtetba, teinyakba aser taremsükba. Iba ama tetsü agi asenok tzüra atemer. Ojalaji asenok atema Tsüngremi moatsüba chubatsür, anungji chubatsür ama asenokia akhümtsüba meimdi aser bilemetetdi.

OLEMSABANG

Shirnok dang lenir tajung ta ajatsü ???

~ L.Kika Pongener.

(Yashi adok nungi...)

Tangar mezüngmeshia, ila-a, numja-lutsüba (Under estimate), tangar sensa-masa-a, atala-a menutsüba (Insult) jakla kheni malitsüla. Lenir ka dak tetokdak/langkotem jakla malitsüla, yak-yakta ain adokba, tanu ajung asa-a inyakba, tarutsü indang meshisadangba, yamala jakla yimya kheni malitsüla. Otsüla-oboula nungeri jembia aruba shin o ka... "Tsürabur nungi kodanga tazung/tokolak menden nung ata-a atongoka marudangba/melidangba nisung"... Kodang tazung/tokolak menden nung mendir, atadir, atongokdir, tangar tenük agi mangur, shia-metetba, kaa-aitba, uluba kanga shisangtsü, aser pei jenjang ajungtsü arishidang, pei lima, pei yimtsung, pei atenba telok, raksatsü/lemsatsü kecha mapayutsü. Saka, shirnok tsürabur nungi tazung/tokolak menden nung ata-a/atongoka yimsüsüa/lenir sua aru, parnok jagi pei lima, pei yimtsung, pei atenba telok raksadang nungibo ni-ang takoksa aremndi ta asütsü, mesüra pei kija ajungtsü marishitsü.

Tanü asen lima nung, lenir tajung agi kanga anung-akonga lir. Loktiliba aika lenir tajung maliba agi tejakleni moi rajang akümer, telongjem malir, yimjung-tesunep malir, teraksa/telemsa adoker. Tanü asen lima yimten, arogo aser loktiliba aika nung, lenir kati pei mapa makokba, pei nem nungloksüba tashi mamshitetba, tangar nem anishitaksükba (Puppets & Remote Control) lenir karbo lir. Yimtsung aika nung yimsüsürtemi pei tashi mamshitet, tezülen nungi tangar nem yimsusudaksüba ajanga teraksa/telemsa adokba karbo lir. Ibala ama pei mapa makokba/pei tashi mamshitetba yimsusur/lenir kati yimten, arogo aser lokti-ji kodanga wazüka/kümszüka meyetettsü. Tanü asen lokti nung teraksa/telemsa adokba tera ya, jungjunga bushidanga ora, teimba ka lenisuba shilem agi raktepba, tokolak menden agi raktepba, tenükmerem agi kati ka arishitepba, yamala kulitem ajanga teraksa/telamsa ya teimba adoker.

Kanga tesasatsü-ka, tanu asen loktiliba aika nung ochishir lenir mali, pei ajungtsü bushiba lenir, yangko semer tenzüker, supokrem meimer teimba lir, ibajagi asen lokti ya tejakleni maor aser teraksa/telemsa adoker. Ano yimten, arogo aser lokti raksaba kuli kaji, nisung o nisung na tsüngda nijaren nung tsükchitepba, arishitepba, kin o kin, kidong o kidong, tsüngda tsükchitepba, ibaji yimten, arogo aser lokti ken o kümdaksüba ajanga lokti raksar/lemsar, aser linük, yimtsung, loktiliba terenlok lenmang aisu nung takoksa aludaksür. Ajak dak alaka, nisung shiai, pei sasa pei jenjang angatettsüla, nisung shiai ni kechi akoktsü (?) kechi mapa atema ni ya tapet asütsü (?) ta shisadangtsüla. Lokti-i/nuburi asen nem nungloksü yongjia, aseni makoktsüba mapajibo mezünyongi magizüktsüla/menangzüktsüla. Aji oda, aseni nangzüker/agizüker aseni mapaji koka/jita bener mootetra, asen-a kanga belemtsü/tim-atemtsü, nubur matsüngdanga maksu asütsü, aser loktiji tamakok aludaksütsü, aser tejakleni aotsü melena rajang kümdaksütsü. Nutsung-nubu agi meperiba yimtsung aser lokti nung, tembang ka numa korang semoktsünuba ama, nubu makaba/meperiba agi, shibai kechi mapa akoktsü (?) koba mapa atema shiba tapet/tetemsu asütsü (?)...ta meshisadangi, tata asaa shimer. Ibajagi aiben yimten, arogo, aser loktiliba-ji lenmang aisu nung tsükdaker/chidaker aser takoksa/tamakok ajurur.

Atangji, lenisuba shilem yabo tapi-tapi agi tata asa-a alemtsüba/nungloksütsüba masü, saka kanga shisadanga dang inyaktsüla. Aji oda, nisung karibo, ni ya kong amentsüla (?) Ni ya kong noktaksüla (?) Ibalaji mangatetba nisung karbo lir. Alima asünungji, Kiyi-Pongzü rongnunga Tsüko-Tayi, Ango rongnunga Ngaya-Longjak, Sungdong rongnunga Nguprong-Ngupdi ama... Nisung rongnunga alakteta karbo lir. Mongdang-mongji/benjong-bentsü ajunga nung menden telemsa ayur. Iba ama telemsa ayuba jagi mongdang-mongji/benjong-bentsü-ji meraketa topur jungdaksür. Ano kasaji tenla kidang tekülem nunga, meraketa topur ajungtsü atema, nisung shiai pei jenjang angateta asen kong amentsüla, aji angateter menra, koda-ka topur tajung/mera-taket asütsü. Hau ni...Tsüngrem tsüngdang tulu-tila, takar-sensaker, tanak-temesung kecha tebandang mali...saka alima asünungji, tangari mashiyongjia, asen sasa pei jenjang angatettsü kanga tongtipang. Atangji, iba ama wainshin meteter nisung dangji lenir tajung ta ajatsü.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

China sorkari App Store nung Khristan apps/websites shibangtsür

May 08, 2021: Tawa China nung Communist sorkari linük nung Bible apps balala aser WeChat Christian public accounts aika shibangtsüogo, ta International Christian Concern (ICC) osang ajanga metetdaksü.

ICC-i ashiba agi, ketdangsertemi WeChat nung Christian accounts shibangtsüogo; China nung Khristantemi "Gospel League" aser "Life Quarterly" ama WeChat Christian pages lapoktsü merangba mapang nung screen nung, "Iba account ya ajanga 'Internet User Public Account

Information Services sorkari WeDevote Chinese Management Provisions' Bible app anenja liasü, ozüngtem alema inyaker aser iba account ya anenogo," ta adoker.

Chinese Christian Fellowship of Righteousness nungi putir, Francis Liu-i Khristan pages shibangtsüba indang screenshots noksatem pa indang Twitter page ajanga lemsatep.

China sorkarisa Chinese App store nungi Bible apps agienogo, saka Bible Apps download sünertemi VPN amshitsüsa akümtsü, ta ICC-i metetdaksü.

2019 küm nunga China

Information Services sorkari WeDevote Chinese Management Provisions' Bible app anenja liasü, kechiyong iba app ya million 10 ben dak tema download sür liasü. Iba dak alia YouVersion ama American Bible apps-a Chinese app store nung mangur.

Osangbener den jembidang WeDevote co-founder, Levi Fan-i ashiba agi, 2015 küm Beijing nung Public Security Bureau-i pa dang Christian WeChat account nung pa aser kinüngtsü nati züluba ocettemji ketdangsertemi meteta lir, aser pari ki tasen aliba meteta lir; ketdangsertemi pa dak tenük yokdar, ta metetdakja liasü.

Kerala nung Khristan putir 100 tema dak Covid putet; ana asü

Thiruvananthapuram, May 08 (Agencies): Taoba ita Kerala nung Idukki district kübok Munnar nung Khristan lenirtem retreat ka agiba sülen iba sentong nung shilem agi putir 100 tema dak coronavirus tashidak putet aser putir anabo süogo.

Coronavirus puteta alirtem rongnung Church of South India (CSI) South Kerala nung putir, Dharmaraj Rasalam densema lir.

Iba sentong nung adener putir ana- arrshi küm 52, Bijumon aser Rev. Shine B Raj (43) na dak coronavirus putetba sülen taoba hopta tenaprong

Information Services sorkari WeDevote Chinese Management Provisions' Bible app anenja liasü, kechiyong iba app ya million 10 ben dak tema download sür liasü. Iba dak alia YouVersion ama American Bible apps-a Chinese app store nung mangur.

Osangbener den jembidang WeDevote co-founder, Levi Fan-i ashiba agi, 2015 küm Beijing nung Public Security Bureau-i pa dang Christian WeChat account nung pa aser kinüngtsü nati züluba ocettemji ketdangsertemi meteta lir, aser pari ki tasen aliba meteta lir; ketdangsertemi pa dak tenük yokdar, ta metetdakja liasü.

Information Services sorkari WeDevote Chinese Management Provisions' Bible app anenja liasü, kechiyong iba app ya million 10 ben dak tema download sür liasü. Iba dak alia YouVersion ama American Bible apps-a Chinese app store nung mangur.

Osangbener den jembidang WeDevote co-founder, Levi Fan-i ashiba agi, 2015 küm Beijing nung Public Security Bureau-i pa dang Christian WeChat account nung pa aser kinüngtsü nati züluba ocettemji ketdangsertemi meteta lir, aser pari ki tasen aliba meteta lir; ketdangsertemi pa dak tenük yokdar, ta metetdakja liasü.

MENÜREMA ALIBA OJALA

Nüngjang tongpoka anüngtsüing sangwa-a anü atok medem, Küm shia May ita tanabuba Deobar anogo, America Tzür ANNA JARVIS Tetzü sür rongjenseta nüktsü ayimba mapang, La sür küm ana ajungnü, Tetzü-i meimba "Carnation" naro temesüing, Tejong ka-ka tanur shia nem agüja la molungtok Tetzü temeim lemsatep. AMERICA tir Wood Wilson-i 1914 küm Ojalatem anogo amongtsü lemtet. Ibai tesüngmangtsü Tsüngremer maongka la ajanga abensadaksüogo.

Tanü alimai nüngdaker Ojala ta ajaba rongnung tajungtilatem, Shibai sarasadem, tamang mapa agi ajemalua kibong junga angateter, Teraksar rongnung kodanga matener, saka teyanglutsür lensanir, Angangjo! Yihudatzür ka, shisataka, tamang takang, jakla tajung "ABIGAL" La dak ajemalu aser temeim sembet tulu liasü, taremsük aser yimjung abenla, La asoshi tsükchir shianga mali asü, la ola osü agi mit atoka alira puadaksü, Kinungbo luja mejembi, saka Dawid tsüngdang apudaka tatok meshila mesük shiba lir?

Alima nung tetzürbo aika lir, saka Ojalabo palaka, la amabo melika. Medemer aser adianu, temolungtok tembar aika lir, saka Ojalabo ka dang. Iba lima nung la melentsübo shinga mongutetka ni... Tongpoka motetba kuret aiben ajurudang kützü-ibo ajangdanga aotsü lemanng sayu. Iba tsüingi o ni asoshi tsüklawa tzü temokong ama liasü. Menürema kützü-i ashi, tenü, titi süngjemang, sarasademang. Ojala tasü tait o agi kü taküm nung tetsübu ajak sama-a oatok.

Taküm nung Ojala... ta ajaba agi danga anisüngzük tulu angur, Kichi-anga mesayangi alidang memeteti ola atok... OJA-A... Shirang yipden nung nunga tashidak makoki alidang ola atok... OJA..A... Teimla samar ajaki sentoker alidanga ni oja... OJA..A... Kuret agi neneter, teyarir shinga malidang ni ayimten... OJA..A... Meimchir-i kiyonger, medemsor, takar, tulur shimer, Saka Ojalabo Tsüngremer shimtetsüba Tetzür, la meimbo memelentet.

Tanü Tetzü temeim anogo amongertem! Ni ya shinür, akümüli nung Ojala alirtem dang, La mama yonga, lar oshi angazük, la ket ajanga jajatsü tenzük, temungratsüka! Shibaibo amatoktetsüaka! La soro majung, tashi temetet maliba agi nai sembar asü, Tarutsü nung mesasatsüsa, akümüli nung alidang la kanga meimangni, Tipu lima jagi lurbo kanga longratsü. Saka kodanga lepa marutsü. Ojala dang temeim sentsü teyu, La nungiang temoatsü aser atakatem angutsü. Tensa tia ajak nung menürema aliba Ojalatem kichiba metoshitsüaka!

Mrs.R.Mapukala Pongen Merangmen (Tzürangkong)

ANOGO ABEN TSÜNGREM DEN

Asenok jungkai adokba ajanga alir

Kong ainkar sayutsüingi mali, nübur tesoetba mali saka shibai ozüing benshir pa temoatsüba. A. Shin 29:18.

Alimaji mangdang agi anir. Tsüngremer nübur jungkai adokba ajanga alir. Alimai nükitong aser alizüing atongtsü bushir. Nüburtemi tulutiba aser jangratemtsü temulung asütsü bushir koba asoshi parnoki parnok taküm yutsür. Institutionsi alizüing ayur aser ibaji tongtettsü asoshi parnoki tentet tentetter. Tsüngremer nüburi lemanng balaka nungi inyaker. Khristantemi parnok taküm Tsüngrem jungkai adokba nung yanglur. Asenok tarutsü taküm asoshi kechi tajungtiba asütsü ta bilemer ta Tsüngremer asenok tebilemba masüngdang. Pai asen nungdak metetta kar. Tsüngremer asenok nungi aginübaji Pai Pa mulungjang nung aliba jungkai adoktsüba aser asenok asoshi Pai mulungba kechi lir iba nung asenoki temulung agütsüdaktsüner, kechiaser Tsüngremer lemanngtemji asenok lemanngtem masü! (Isa. 58:8-9).

Kodangsa nüburi pei taküm Tsüngremer jungkai adokba mamendaklir parnoki tazüokba ajak magizüker. Iba tetezü parnok nükdang kechi junger ta bilemer aji inyaker. Parnoki parnok alizüing ayur, parnok nungdaktem yanglur aser Tsüngrem dang moajang ta sarasadem. Khristan karbo Tsüngrem nungi talangka pilar alir aji saka parnoki sarasademtsü jangrar aser Tsüngrem dang parnoki merangba nung moajang ta asüngdang!

Na asoshi Tsüngremer mulungba lemanng metettsübaji Pai ne dang jungkai adoktsübaji dang lir. Nai ibaji nai mulungba lemanng nung kodanga mangutsü mesüra memetettsü. Kodang nai Tebu dang angashir, indangyongjisa ne taküm asoshi mapa kar: tashi angaba. Apijemtsü Shin züluri ashiba ama: "Shibai ozüing ayur pa tepelatsü."

Tanü Ojala Temeim Bilemteta Tenüngsang agütsür

Temeim Oja, alima nung liyonga arudang tensa mapang ajung, majung ajak ajuruba den tsüngkum mopong melentepba den timtem tushir jenti ajuruaka nai onok kodanga alashia meyutsüba nü temeim tu tanü onoki bilemteter.

Oja, ni kodang nü numenden nungi alimai alu, oda iba mapang nungi ni nü tebima nung nai ajunger, nü temeim tashikang agi ni awabanger ni indakja mesüetba temeim tu tanü onok mulungi arur. Talisa nai asen Tsüngrem temeim angateta ni anpaluba ya senti long dang nungi taoba ta tanü onoki na tushir.

Ita, petinu anung nungi alima ajak ramoka perangshia sangwadakja yaloka liaka item ajak dang nungi ojala temeimjisa tuluba, anungji tanü onoki Ojala asoshi asen Tsüngrem dang nü arishi moajang ta sarasademtsür.

~ Mr. S. Repa Pongner, Mon Bosti

Pongjen dang apongba tsüki

~ Tarep Jamir.

Oh, koda tepur tajung, sentsüperang akhüm taküt Amang sangwa mebendangi Pongjen dang apongba tsüki Kü temeim ojala Meta talang nungia nür tsüki penzür. Yasatzürar ajak poksüngdak Nür tsüki nungi züsenteter. Kodanga makongba tzüpokdak Nür tsüki nungi pokteter. Teyimla samar shisabulua rongjenseta alidang Nür tsüki nungi anisüngzük angur. Oja, nür tsüki ya alima nung Kecha dena metemangtsü makok. Chubar tsüki nungi teyimla tasen mesoteter. Saka nür tsüki nungibo Teti asoshi tepeladak jenjang sotettsür. Oja, tanü alima rangbeni na tushitsü tetemsü. Kechiaser nai ajak tongpang koktetogo. Sentsüwangshi konang naroküm ajak nü meyong Kechiaser nü temeimbo pongjen dang aponger. Sensaker asoshi nü teka tatsü masü. Na asoshi anisüngzük maka Alima rangben asoshi tesünep yimjung apu yangludang. Oja tanü ozüi nü nem alima rangben agüjaka Nü tsükibo madoksar Shirang yipten nung anüngsetta alidang Nü ola tanüp agi ajak süneptsür. Anüing ali yanglusangi Lijen dang alitsüba lima tongtettsü mechi nung Menti tashi ama ajala arishijangma.

OLONG PAITEP # 5806


1		2			3				4	
					5					
6										
					7			8		9
10						11				
		12			13					
	14						15			
16										
					17					

- | | | | |
|--------------------------------|--|----------------------------------|--|
| TIPILEN | | LANGTSÜNGLEN | |
| 1. Aontzü tatetba oset - (6) | | 2. Takok ngutet - (8) | |
| 5. Yagi kilem tongdancer - (6) | | 3. Na kisung - (4) | |
| 6. Ausang shiruru - (4) | | 4. Kaji anaben bendenba - (3) | |
| 7. Jashia nüktzü yimdok - (4) | | 6. Kolaksemsü - (6) | |
| 10. Alinük ladangba - (5) | | 8. Amar aliba yimdangi aru - (8) | |
| 11. Anien - (5) | | 9. Ajak külemi ajurutep - (6) | |
| 12. Aika masü - (4) | | 13. Süng teküp - (4) | |
| 15. Akuoktsü - (4) | | 14. Odangsa - (3) | |
| 16. Anapronglalen - (6) | | | |
| 17. Temoatsü agütsü - (6) | | | |

OLONG PAITEP # 5805 TELANGZÜBA

- | | |
|--|--|
| TIPILEN : | LANGTSÜNGLEN : |
| 1. Atang, 3. Akuku, 5. Ajem, | 2. Tajak, 3. Ayok, 4. Kiset, 6. Maksü, |
| 7. Osü, 8. Akok, 10. Nati, 11. Sempa, | 9. Ama, 10. Nashi, 13. Tarak, 15. Ratet, |
| 12. Itsü, 14. Saru, 17. Aru, 18. Inti, | 16. Sang. |
| 19. Akong, 20. Senti. | |

Noksa nung meputepi aliba 12 bushiang



TANÜBO NAI LANGZÜANG

Q. Koba küm 'Battle of Litani' rara liasü?
 A. June 9, 1941 B. June 10, 1955
 C. June 11, 1965 D. June 12, 1972
 _____ (Taruba adok nung onoki langzüksü)
YASHI ADOK TELANGZÜBA : Microsoft

AO OSHI ANGAZÜKDAK:

TANÜ ANGAZÜKTSÜBA OJANG



Etsük
 (n) Aon atema au lanu ajensar ayuba (crushed bamboo shoot)
 * Shi aser ango nung etsük enoka asoba kanga junga achir.

Esü
 (n) Etsük akongba (dried bamboo shoot)
 * Tsüiner (Lotha nunger)-i esü kanga junga akonger.

NAI-A YA METETTER MA?

AMAZON PRIME NUNG SAYATSÜ ALIBA SHOWASER MOVIE KAR: MAY 2021

- May 9 : Robot & Frank (2012)
- May 13 : Saint Maud (2020)
- May 14 : The Underground Railroad: Season 1 *Amazon Original Series
- May 15 : Morning Glory (2010) (IMDb TV)
- May 17 : How I Created a Cult (BBC Select)
- May 19 : Red Dawn (2012)
- Trumbo (2015)
- May 21 : P!nk: All I Know So Far (2021) *Amazon Original Movie
- Solos: Limited Series *Amazon Original Series
- May 24 : Louis Theroux: Life on the Edge (BBC Select)
- May 28 : Panic: Season 1 *Amazon Original Series
- May 31 : Extraordinary Places to Eat (BBC Select)

SUDOKU # 5850

TELANGZÜBA # 5849

					7	1	5	1	9	6	4	8	2	7	3
5				6	4		7	8	2	5	3	9	4	6	1
	3		9	4	2		6	3	4	1	2	7	9	8	5
			3	7		8	2	8	9	5	7	1	4	6	3
					6			2	4	1	9	6	3	8	5
4						1	9	3	7	6	2	8	5	1	9
	5				7	3	9	5	8	4	7	1	3	2	6
				4	1	9	1	2	7	3	9	6	5	4	8
		2	1			4	4	6	3	8	5	2	7	1	9

OJANG LUTEP # 5392

AALMI	:	<input type="text"/>	<input type="text"/>	<input type="text"/>	<input type="text"/>						
UNNG	:	<input type="text"/>	<input type="text"/>	<input type="text"/>	<input type="text"/>						
TTSEÜ	:	<input type="text"/>	<input type="text"/>	<input type="text"/>	<input type="text"/>						
EEMMJTII	:	<input type="text"/>									
KCHAE	:	<input type="text"/>	<input type="text"/>	<input type="text"/>	<input type="text"/>						
DEAN	:	<input type="text"/>	<input type="text"/>	<input type="text"/>	<input type="text"/>						
MEMANGTEDDSÜ	:	<input type="text"/>									
OKBMAKA	:	<input type="text"/>									
TEIEMM	:	<input type="text"/>									
RLI	:	<input type="text"/>	<input type="text"/>	<input type="text"/>							

OJANG LUTEP TELANGZÜBA # 5391

TSÜNGREM DAK ALAKA ALIMA NUNG ABENSAA METETBA NISUNG SHINGA MAKA

TAN HOPTA ATEMA - KOMA SÜLA ?

Q. Asen lima nung Covid-19 agi shirangertem anepalutsü pur doctor aser nurse-tem agi meperi aküm nunga koma süla ?



Kolkata, May 08, 2021: Honibarnü West Bengal assembly nung Speaker shimba sülen Chief Minister, Mamata Banerjee-i Speaker, Biman Bandopadhyay nem naro agütsüba noksa nung angur.

India nung anonisung lakh 4 dak Covid putet aser 4,187 asü

New Delhi, May 08

(Agencies): India nung anonisung lakh 4 tema dak coronavirus putet aser nisung meyrjang pezü dak tema süogo.

Tesüiba ghonda 24 tsüingda linük nung nisung 4,187 coronavirus tashidak agi asü aser linük nung iba tashidak agi shiranga asürtem ajak agibo 2,38,270 jungogo, ta Honibarnep 8:00 ako nung Union health ministry data ajanga metetdaksü.

Alima nung anogo ka kija nung coronavirus tashidak agi nisung 4,000 dak tema asüba linük asemji US, Brazil aser

India linüktem dang lir. Taküm January 12 nü US nung coronavirus tashidak agi nisung 4,490 tashi asü.

Health ministry-i ashiba agi, tesüiba ghonda 24 tsüingda India nung nisung 4,01,078 dak coronavirus putetba densemabo linük nung nisung ajak agi 2,18,92,676 dak iba tashidak putetogo aser tang iba tashidak agi teshirangdakpur 37,23,446 lir.

Linük nung iba tashidak agi shiranger 1,79,30,960 anepogo aser iba tashidak agi shirangertem asüba shilembo 1.09 dang lir.

Honibarnep Indian Council

of Medical Research (ICMR)-i, tang tashi nung linük nung samples ajak agi 30,04,10,043 tendangogo, aser iba nungji May 7 nü samples 18,08,344 tendangba densema lir, ta metetdaksü.

Tesüiba ghonda 24 tsüingda coronavirus agi shiranger 3,18,609 anepogo.

Tang coronavirus tashidak putetba shilem 71.81 bo state 10 nung lir, aser item states rongnung Uttar Pradesh, Maharashtra, Delhi aser Kerala densema lir, ta Union Health Ministry data ajangasa metetdaksü.

CWC nung Congress-i election nung tamakok anguba atema jembitsü

New Delhi, May 08

(Agencies): Hombarnü (May 10, 2021) Congress Working Committee (CWC) senden amentsü, aser iba senden nungji tawa state kar nung agiba assembly election nung party-i tamakok anguba aser tang linük nung coronavirus tensa atema jembitsü.

Hokolbarnü Congress Tir, Sonia Gandhi-i, Centre nung BJP-i aniba sorkari tamakok nguogo aser coronavirus wara mapang nung sorkari parnok teinyaktsü khuret meinyaktet, anungji iba wara tensa atema o lemteptsü asoshi sorkari

tekaraba nung party ajak senden ka ayongzüksüla, ta takhangba agüja liasü.

Hokolbarnü Congress Parliamentary Party (CPP) senden nung jembidang sorkar aija lai, "Tanü yimtenren lenirtemi India tsüingtsüker kümdaktsüogo, aser parnok shingaiia nübur atema aria mebilemstür," ta ashi.

Tawa state pezü aser UT ka nung agiba Assembly elections nung party-i tamakok anguba dak sendakba nung Sonia Gandhi-i, iba ya tejashitsü tulu, party-i ajemalushir lesson agitsüla, ta

ashi.

Congress-i Assam aser West Bengal elections nung tamakok angu, talisa West Bengal nung parnoki menden ka nunga takok mangu. 2016 küm West Bengal election nungbo Congress-i menden 40 nung takok ngua liasü.

Ita ana tejaklen Puducherry nung Congress sorkar liasü, saka tan election nungbo parnoki menden ana nung dang takok ngua liasü.

Tamil Nadu nung ang Congress-DMK teloktepi AIADMK-i aniba teloktep madak takok angu.

India nung Covid agi shiranger lakh 9-i oxygen agidar: Harsh Vardhan

New Delhi, May 08

(Agencies): Honibarnü Union Health Minister, Harsh Vardhan-i, tang linük nung coronavirus tashidak agi shiranger 9,02,291-i oxygen support agidar aser coronavirus agi shiranger 1,70,841-i ventilator agidar, ta metetdaksü.

Linük nung coronavirus tensa asadangsü atema amenba senden Group of Ministers (GoM) senden nung Health Minister-i, coronavirus caselaod nungi shilem 1.34 ICU nung lir, shilem 0.39 ventilators nung lir aser shilem 3.70-i oxygen agidar, ta metetdaksü.

Iba senden nung Minister of External Affairs S Jaishankar, Minister of Civil Aviation Hardeep S Puri, Minister of State for Ports, Shipping and Waterways and Chemical & Fertilizers, Mansukh Mandaviya aser Minister of State, Ministry of Home Affairs, Nityanand Rai nung aden.

Union Minister-i, linük nung coronavirus agi shiranger 4,88,861 ICU nung lir, shiranger 1,70,841 ventilators nung lir aser shiranger 9,02,291-

i oxygen agidar, ta ashi.

Online ajanga agiba senden nungsa Minister of State, Health & Family Welfare Ashwini Kumar Choubey aser Member (Health), NITI Aayog, Dr Vinod K Paul nata aden.

Senden nung NITI Aayog züngsem, Paul-i Empowered Group-1-i inyakba mapatem osang metetdaksüba den külemi shirangertem tajungba anepalutsü atema hospital infrastructures tajungba akümba osang metetdaksü.

Secretary, Ministry of Road, Transport and Highways (Chair, EG-2), Giridhar Aramane-ia Liquid Medical Oxygen yangluba, lemzüksüba aser supply asüba osang metetdaksü.

Aramane-i ashiba agi, tang coronavirus tashidak agi shirangertem nungdak apir Liquid Medical Oxygen (LMO) timba yangludar.

Linük nung tang anogo shia oxygen Metric Ton 9400 dak tema yanglur, iba denji külemi bendang linüktem nungia Liquid Medical Oxygen bener arutsü atema inyakdar, ta paisa metetdaksü.

Wara mapang Central Vista project inyakba atema Shiv Sena-i sorkar aitsü

Mumbai, May 08

(Agencies): Honibarnü Shiv Sena-i, India kidanger linüktemi India nung coronavirus wara anema raraba nung yaritsü asüingdangba mapang nung Modi-i aniba sorkari sen crore aika indang Central Vista project mapa anentsü memelunger, ta aitsü.

Shiv Sena-isa, tesüiba küm 70 tsüingda taoba mapang Ato kilonsertem- Pandit Nehru, (Lal Bahadur) Shastri, Indira Gandhi, Rajiv Gandhi, P V Narasimha Rao aser Manmohan Singh nungeri benokba inyakyim ajanga linüki tensa tamajung aika koktetogo, ta ashi.

Shiv Sena-i, "Tang India nung coronavirus kanga prokba ajanga alima amokmerendar, ta UNICEF-i shiogo. Parnokisa linük aika dang coronavirus anema raraba nung India yaritsüla ta shiogo. Bangladesh-i Remdesivir vials 10,000 yokogo aser Bhutan-i medical oxygen yokogo. Nepal, Myanmar aser Sri Lanka linüktemia India yaritsü asüingdangogo," ta ashi.

"Nehru-Gandhi nungeri benokba inyakyim ajanga India taküm alir. Sensaker linük aikati India yaritsü asüingdang. Tamalen

Pakistan, Rwanda aser Congo linüktemia tangar dang nungi teyari agiogo. Ajisüaka tanü yimsüsürtem asalentong majungba agi tang India nung iba tensa ya ajurur," ta Shiv Sena-i metetdaksü.

Tang sensaker linüktemia parnoki akokba agi India yarir, ajisüaka Ato kilonser, Narendra Modi-i sen crore 20,000 jenjang Central Vista project mapa anentsü memelunger, ta Sena-i aitsü.

"Külen India-i Bangladesh, Sri Lanka aser Bhutan ama linüktem dang nungi teyari agir, saka külenbo Modi-i Parliament building tasenba aser Ato kilonser ki densema aliba Central Vista project mapa anentsü memelunger," ta Shiv Sena-i metetdaksü.

Alima linüktemi coronavirus tanaben prokba anema raraba mapang aser mongintemi ano maneni iba tashidak mejungi proktsü, ta asadangteter liaka tanü tashi BJP-i West Bengal nung Mamata Banerjee anema inyaker, ta Sena-i aitsü.

BJP MP, Subramanian Swamy-ibo Union health minister, Harsh Vardhan-i tamakok nguogo, anungji Union minister Nitin Gadkari nem health ministry agütsütsüla ta shiogo, ta Shiv Sena-i metetdaksü.



May 08, 2021 nü Kanpur (Uttar Pradesh) nung coronavirus tashidak agi asürtem tasü mang rongdoktsü atema kinüngertem atatepba noksa nung angur.

Jerusalem nung police aser Palestine nunger tsüingda mangatettep adok



Hokolbarnü sarasadem tembangba sülen Police aser longkak aiterem tsüingda mangatettep adokba noksa nung angur.

Jerusalem, Monupii/May 8 (Agencies): Hokolbar aonung Jerusalem kübok Al-Aqsa mosque kima Israel riot police aser Palestine nunger tsüingda mangatettep adokba sülen nisung 160 dak tema yirugogo. Hopta tepeyong temeshi yimti aser West Bank nung mangatettep adoka arudar.

Palestine nungertemi police tem dak long, bottle aser firework mereploktsü aser police temi meyiper parnok dak rubber injang khaloktsüba den stun grenades poklokja liasü.

Al-Aqsa aser Jerusalem anüdoklen lendong atalokba nung Palestine nunger 163 aser Israel police office trok yirua liasü. Palestinian Red Crescent-

i ashiba agi, emergency takdangtem süngadokba ajanga kima mozüki ka lapoktsüsa aküm.

Nikongtsütsü sarasadem mapa tembangba sülen tekülemer meyirejang aikati longkaka aitba ajanga sepaitem tensa azüoktsüsa aküm, ta police-i ashi.

Hopta ishika Jerusalem nung tensa mejungi lir. Israel-i, Muslim nunger temeshi ita Ramadan mapang yimti tejenba nung tesem kar semdangtsü memelaba aser Israel nungertem lidaktsütsü atema Palestine nunger kibong kar dang parnok ki azüingtettsü tetuyuba agütsüba ajanga Palestine nungertemi longkak

aita arudar.

United States-i azüzükteptsü atema ayongzükogogo aser ashiba agi, pei ki azüingtettsü atema tetuyuba agütsüba ajanga Jerusalem anüdoklen tensa tamajungba akümstsü. Kasa mapang nung United Nations-ia, nüburtem tashiyim agi pei ki azüingtetdakttsüba ya "war crimes" ama züingshitsu akok ta tekümdangtsü metetdakttsüogogo.

Hokolbarnü mangatettep adokba ya Al-Quds (Arabic nung Jerusalem nungja) Day amungba anogo atalokogogo. Iba anogo nung kümshia Iran-i ayongzükogogo pro-Palestinian rally amunger, kong Muslim nungeri amokbanger aliba linüktemi

shilem agir.

Palestine tir Mahmud Abbas-i, iba mepetmesü ya Israel sorkar dak tai tongloktsüogogo aser pai Aqsa nung Palistane nungertem pusemba metetdakttsüogogo.

Alima kintemi azüzükteptsü ayongzükogogo aser kasa mapang nung Middle East Peace Process atema UN Special Coordinator Tor Vennessland-ia, tensa mejungi akümba ngua shisabulua bilemba lemsatepogogo aser telok ajak dang yimjung aser tesunep atema Jerusalem yimti tejenba nung temeshi tesemtem nung status quo benoka aliba akhümtsübuttsü mepeshia metetdakttsüogogo.

Ramadan amungba mapang tatembangbuba Hokolbarnü sarasademtsü atema Muslim nungertem Al-Aqsa kima adenshir aliba mapang iba mangatettep adoka liasü.

Kasa mapang nung Hokolbarnüsa Israel security forces-i Palestine nunger ana tepset aser ka yirutsü. Parnok asem yagi West Bank nung amenoker aliba Salem base nung injang khaloktsüba sülen tepset, ta police-i ashi.

Deobarnü West Bank Tapuah junction bus stop nung Israel nunger arishi küm 19 tain ka kanga mejungi yirutsü.

Iba dak sendakba nung Israel security forces-i ashiba agi, iba tesem amakba dak

sendakba nung parnoki temulung memeli bilemba sülen Ramallah anasa Montasser Shalabi, 44 puogo. Palestine nunger source kati, Shalabi ya US sensoa bena aliba nisung ka, ta ashi.

Bodhbarnü Israel sepaitemi arishi küm 16 tain Palestine nunger ka tepset. West Bank nung longkak aiterem police tem dak petrol bomb mereploktsüba sülen meyiper injang khaloktsüba mapang iba nisungba ya tepset.

Maneni Jerusalem anüdoklen Sheikh Jarrah tesem nung police aser longkak aiterem tsüingda mangatettep adoka liasü. Palestine nunger refugee tem aser iba tesem nung aliba Yihuda nungertem ali dak sendakba nung küm ka shia mangatettep adoka aruba nungi iba mepetmesü ya tenzük.

AFP correspondent-i ashiba agi, Hokolbarnü aonung iba tesem nung nisung 100 shi-i longkak aita liasü, aser parnok senshidaktsütsü atema police temi stun grenades aser water cannon amshi.

Sheikh Jarrah aser Damascus kikümtong anasa mangatettep adokba sülen nisung aika yirugogo, ta Red Crescent-i ashiba den hopta tetenzüklen nisung 22 shi yiruba metetdakttsü.

Israel police-ia Bodhbar aser Brehostibarnü nisung 26 puogo.

Pakistan opposition lenir Shahbaz Sharif linük adena modaktsü

Lahore, Monupii/May 8 (Agencies): Pakistan nung temang manemi aliba opposition lenir, shiba ochi mashi ken o nung aija lir, pa Honibarnü linük toktsür aotsü memelai Lahore international airport nungi meyipa yok, ta par party otongdari ashi.

Parliament lower house nung opposition bloc aser Pakistan Muslim League party tekolakba Shahbaz Sharif, London-i aotsü atema Qatar Airways tayimtsüü atutsü temelaba magütsü, ta party otongdar Maryam Aurangzeb-i ashi.

Lai ashiba agi, airport nung immigration ketdangser-i, Sharif tenüng maneni black list nung lir anungji pa linük toktsür motettsü ta ashi.

Hokolbarnü Lahore High Court-i, Sharif Pakistan toktsür aotsü aser bendanglen July ita tetenzüklen tashi temang anepalua amungtsü asoshi temelaba agütsüogogo. Sharif shiba cancer tashidak agi shiranga liasü aser Pakistan adena or temang anepalutsü nungdaker, pai temepeshiba ka benokba sülen okadaki iba jenjang agi.

Okadak ajanga tetuyuba agütsüba sülen Ato Kilonser Imran Khan-i aniba sorkar aitsü tenzükogogo, shirnoki Sharif linük toktsür meyoktsü atema temzüng ozüing tsütsü lenmang bushitsü ta ashi. Information Minister Fawad Chaudhry-i, Sharif mesera par party-i pa blacklist nungi agintsü atema application agütsüba sorkari magizük ta ashi.

Sharif ya ochi mashi ken o asem nung aija lir. Nawaz Sharif office mapa abentsü atema tenokdangba agütsüba sülen pa lenisüba nung teti indang party Pakistan's Muslim League inyaksangshir. Taoba Ato kilonser Sharif, ochi mashi ken o dak sendakba nung aija tepuokdaki yokogogo saka pa dang London nung lidar. Pa 2019 küm bendanglen oa temang anepalutsü atema bail nung tepuokdak nungi chiok saka meyipa maru.

Kasa mapang nung senotsü ochi meshi amshiba ken o nung aija apuba sülen ita tenet shi lir külen Shahbaz Sharif-a taoba itaokadak ajanga tetuyuba agütsüba sülen tepuokdak nungi bail nung chiok.

Argentina nung mid-term elections thinener

Buenos Aires, Monupii/May 8 (Agencies): Covid-19 wara pokteter aliba ajanga Argentine sorkari opposition party den hai haura kaa, primary aser mid-term election thinentsü telemtetba agiogo, koba August nungi tenzük hopta pongu agitsü liasü, ta Interior Ministry-i Hokolbarnü ashi.

Argentina nung tang yimsü tesüdak center-left "Frente de Todos" coalition-i Senate nung majority angutsü aser lower house nung parnok jenjang akangshitsü asoshi merangdar.

"Health aser nisung taküm mezüing südaktsür onoki taküm election thinentsü atema blocs

balala den hai haura kaogogo," ta Interior Minister Enrique de Pedro-i ashi.

Opposition coalition Together for Change nungi Mario Negri-i, nisung timba nem vaccine magütsü tashi ataa alitsü atema telemtetba agiogo, ta ashi.

Lower Chamber nung menden 257 nungi 127 tazüing lir aser Senate nung menden 72 nungi 24 tazüing lir.

Bushitsüingdangertemi iba election nung sorkar kümteter aliba party menden kar nungbo tamakok angutsü imlar, ajisüaka iba ajanga Senate nung majority aliba matsüingtoktettsü akok.

Primary elections koba August 8 nungi September 12 tashi aser mid-terms koba October 24 nü agitsü agitsü liasü iba ya Noveber 14 nü agitsü.


Taoba küm wara poktetba sülen Argentina nung tang nisung timba dak Covid-19 tashidak poteta arudar. Hokolbarnü tashi nung nisung million 3.1 dak tshidak potetogogo aser nisung 66,872 süogogo.

Tang tashi nung Argentina nung nütsünyongtsük million 45 nungi nisung million 8.95 nem vaccine mezüingbuba shilem agütsüogogo aser nisung million 1.3 vaccine tanabuba shilema agiogo.



Afghanistan kübok Kabul yimti anüolen aliba school ka anasa bomb apokba sülen yirur aliba kaketshir ka mozükidangi anir aoba noksa nung angur.

Celine Dion-i 'Courage World Tour' athir



New York, Monupii/May 08, 2021 (Agencies): Nüngtugu kentener Celine Dion-i la indang 'Courage World Tour' sentong renemba ama masü saka 2023 küm nungang agitsü asoshi anogo atsülangba lemsatepogo. 'I Drove All Night' ken atenla Celine-i iba European leg

ya renemba ama taküm tsüklawa mongpu nung magitsü aser iba Tour sentong küm ana atsülangtsür, ta sangoktsüogo.

Iba osang angashia fans tem aoksateper.

Video ka ajanga fans dang Celine-i, "Taküm tsüklawa mongpu mapang Europe nung

nenok den ajuruteptsü asoshi yonya ata liasü. Ajisüaka, tang alima tensa mejungi akumba ajanga renemba ama sentong tem takok ngua magiteter. Nenok tezütanga alitsü akok, saka ajaki iba timtem ya angatdaksüner aser 2023 küm iba show agiba mapang nenok den ajuruteptsü," ta lemsatepa liasü.

"Nenok ajak kumdanga liang aser 2023 küm ang ajurutepti," ta lai ashi.

Iba show ya 'My Heart Will Go On' ken atenla Celine indang 'Courage' kensep pusema agitsü.

Arishi küm 53 tain Celine-i Berklee College indang School of Music nungi Doctor of Music degree agizüktü renema lir.

Canada tsür Celine dak alaka, Pharrell Williams, Donald Harrison aser Chad Hugo nungeri iba music school nungi doctorate agizüktü.

Celine-i ashiba agi, iba degree agizüktü maangka anguba ya konang ama lir aser pelar.

"Alima ajungai jangjaa aliba @BerkleeCollege School of Music nungi honorary doctorate' agizüktü maangka anguba atema pelar aser iba ya konang ka ama lir. Tesüiba kümtem nungi iba jenjang ajangzükta alir Artists rongnung adentsüsa mapang agi sempetsüba ya maangka tuluka ama agizüker," ta Twitter nung Celine-i lemsatep.

Kangana dak Covid-19 putet

New Delhi, Monupii/May 08, 2021 (Agencies): Bollywood actor Kangana Ranaut dak coronavirus tashidak putetogo. Social media sabang ajanga Kangana-i la dak iba tashidak putetba osang den külemi olen kar lemsatepa liasü.

Lai ashiba agi, la tang quarantine südar aser iba tashidak ya koktetsü, koba la atema yimra wara tila ka ama dang lir.

"Tesüina anogo ishika tejakdang nungi kü temang tashimaitba den anibelega aser tenük nung tarongba ka ait. Himachal-i aotsü teimla nung yashi tendanga liasü aser tanü kü dak iba tashidak positive putetba osang angazük," ta Instagram nung Kangana-i lemsatep.

"Ni kü sasa quarantine süogo, kü temang nung iba virus ya party agir alitsü ta ni kecha memetet liasü, saka ni iba tashidak koktetsü," ta lai shisem. Kangana-isa nübur dang coronavirus tashidak metsübutü aser iba wara nem mekoddaksütsüla ya ayongzük.

"Nenok amokbangtsüsa kecha nem maangka tagütsü. Tsübüa aser arendaka bilemra iba jagi nenok tali dang amokbangtsü. Arung, asenok ajak longjemer Covid -19 samatsüdi, iba ya yimra-wara tilaka dak alaka kecha masü aser iba yagi nübur tali aoksdaktsüdar. Har Har Mahadev," ta lai lemsatep.

Tesüiba anogo ishika tejakdang Kangana Ranaut indang Twitter account shibangtsüba osang ajanga angazükogo. Acting tsütsü, Ashwiny Iyer Tiwari indang sports drama - Panga nung lai tesüsa shilem agiba nguogo.

Nüngtugu micro-blogging

platform - Twitter indang 'Hateful Conduct policy and Abusive Behaviour policy' anema inyakba atema, tan hopta tetenzüklen Kangana indang Twitter ya teti atema shibangtsüogo.

Mulungnen O



23.12.1945 - 05.05.21

Onoki teti meima aliba tsürabur Asür **R Sashi Aier** (Süngratsü) mapang tatsüka shiranga lir iba akumulli wadang tembangba anogo tashi shirnokisa rongsen, nubu, aser tamang sarasadem agi yaritepogo nenok ajak dang kanga pelar. Nisung shia tenung teta onoki pelaba melemsateter saka nenok teyari onoki kodanga mamatsü. Tsungremi nenok ajak moajang ta onok sarasadem.

Temiem, Kinungtsü aser kinungertem.

'Secret Headquarters' nung Owen denogo

Los Angeles, Monupii/May 08, 2021 (Agencies): Taruba action-comedy, 'Secret Headquarters' cast rongnung nüngtugu actor Owen Wilson anisemogo.

Henry Joost aser Ariel Schulman nati direct asütsü aliba film nung arishi küm 51 tain actor Owen-i tongti shilem agitsü.

Henry aser Ariel nati Josh Koenigsberg den longjemer script zülutsüogo aser par asem yagi Christopher Yost-i mezüing

renemba draft ka agizüka maparen inyakdar.

Deadline sangdong ajanga angazükba agi, film ya tanur kati par ki teküboklen meimbanga aliba superhero balala indang headquarter ka nguteta aser tsükchir temi iba headquarter amakba mapang pai par medemertem anidener kümzükba indang otsü ka alitsü.

Ano külen, 'Wonder' nung tongti shilem agisang Owen-i Disney+ indang 'Loki' series nung Mobius M. Mobius aser

Wes Anderson indang 'The French Dispatch' nung shilem agiba angutsü.

'The French Dispatch' ya World War II sülen atalokba otsü ka alitsü, kong Owen-i journalist Herbsaint Sazerac ama shilem agiba angutsü.

Iba film nung Owen dak alaka, Bill Murray, Frances McDormand, Tilda Swinton, Adrien Brody, Bob Balaban, Benicio Del Toro aser Timothee Chalamet nunger dena lir.

Owen-isa 'Marry Me' nung Jennifer Lopez den shilem agiba angutsü. Iba film 2022 küm sayatsü.

1997 küm sayaba 'Anaconda' nung Owen aser Jennifer nati Ice Cube aser Jon Voight den külemi shilem agiba nguogo.

Jennifer-i Elaine Goldsmith Thomas aser Benny Media den longjemer 'Marry Me' produce asütsü. Taoba küm sayaba 'Second Act' nunga par asem longjemer inyakogo.

Tepela Lemsateper



Aso:
12.11.1928

Asu:
02.05.2021

Ozui meima aliba tsürabur **T. Benjonglula Jamir** (Asangma), la taküm alidang nungi akumulli wadang tembangba anogo tashi temeimertem, kija, kibong aser lokti shirnokisa sarasadem, nubu aser rongsen agi nungita yaritepogo, nenok ajak dang kangasa pelar. Tulusang Tsüngremi nenok ajak molamoshia moajang.

Chirnur, Semchir-semnur aser kinungertem.

TEPELA LEMSATEPER

"Kibubai agütsü aser Kibubai bener ao. Kibuba tenüng moajang." Yob 1:21.



Mrs. Tialemla Aier (Nokpu)
03.03.1948 - 04.05.2021

Onoki teti meima aliba ojala shirang yipten nung aliba mapang aser la iba lima nungi pilar onok mangyim jashi tia nung alidang kija-kibong, lokti aser arogo nungi shirnokisa tamang sarasadem, rongsen aser nübo agi onok dang meima yariogo, nenok ajak den onoki kanga pelaba lemsateper. Nenok ajak dangi tsüngdong arua onok pelaba meshitetba atema kanga sasar, ajisüaka Tajungsang Tsüngremi nenok temeim mapa tajung asoshi maneni molamoshia moajangma ta onoki sarasademtsür.

- Temeim Chirnur, Semchirseemnur, Anükapang aser Kinungertem.

KANGA PELAR

Onoki kodanga amatsü makokba temeim Obala asür **Tekametong Pongen** (Mangmetong) shiranga alidang aser ozü asüku mapang kija, kibong, kiyonger, yimer-yimsanger, Medizphema Ao Arogo, Ao Union, Ongpangkong Union, Tenempong Welfare Society, Mangmetong Arogo, Salulamang Arogo aser tembartem shirnokisa aria bilema nubu, rongsen aser sarasadem agi nungita yariogo, nenok jaka dang ozü kangasa pelarani ta asüba iba osang kakat ajang lemsateper.

Tulusang Tsüngremi nenok mapa tajung asoshi tali dang moajangma.

Temeim Kinungtsü, Jala, Jabaso Kinunger aser Anükapangtem.



ASO : 22.03.1968
ASÜ : 25.04.2021

Moscow Olympic nung gold medal angusang Ravinder Singh süogo



New Delhi, Monupii/May 08, 2021 (Agencies): Taoba mapang India hockey team nung asayar aser 1980 Moscow Olympics takok anguba team nung shilem agisang, Ravinder Pal Singh Honibar anepdang asü.

Hopta ana tashi Singh ya COVID-19 wara agi shirangba sülen Honibar anepdang Lucknow nung pa iba akümüli nungi pilaogo. Pa arishi küm 65

liasiü.

Singh dak iba tashidak putetba sülen April 24, 2021 pa Vivekananda Hospital-i anir ao.

Kinunger sangdong ka ajanga angazükba agi, Singh iba tashidak nungi taneptsü anguba sülen Brehostibarnü pa non-COVID ward ka nung mungdakja liasiü.

Ajisüaka, Hokolbarnü ajungbena dang pa temang mejungi aküm aser ventilator

nung anepalua liasiü.

Singh, shibai 1984 Los Angeles Olympics nung shilem agia liasiü, pa kibong maküm aser pai par adianu jala - Pragma Yadav toktsür süogo.

Singh-isa 1979 Junior World Cup nung shilem agiogo aser pai hockey asaya wadang toktsür sülen State Bank of India nungi voluntary retirement agi.

Ravinder Pal Singh ya Sitapur nung aso aser 'centre-half' ka ama 1979 nungi 1984 küm tashi pai Hockey wadang nung shilem agiogo.

Olympic asayamung ana nung shilem agiba dak alaka, Singh-isa India tenüing nungi 1980 aser 1983 küm Karachi nung ayongba Champions Trophy nung shilem agiogo. Iba den külemi, tanga asayamung dak alaka, Singh-i 1983 küm Hong Kong nung ayongba Silver Jubilee 10-nation Cup, Mumbai nung '1982 World Cup' aser Karachi nung '1982 Asia Cup' asayamung nung shilem agiogo.

Rishabh-i 'Hemkunt Foundation' nung tenlatsü



New Delhi, Monupii/May 08, 2021 (Agencies): Honibarnü, India indang wicketkeeper-batsman aser Delhi Capitals team captain, Rishabh Pant-i Hemkunt Foundation nung sen tenla agütsütsü sangdongogo.

Novel coronavirus wara tesashi agi shiranga alirtem atema COVID-19 relief kits, oxygen cylinder aser yipden tem alitsütsü nükjidong nung Rishabh-i sen tenla agütsütsü nangzük.

Arishi küm 23 tain Rishabh-i social media sabang ajanga iba osang sangokja liasiü.

"Linük ajünga nung iba wara agi timtemer aika kümogo aser külem nübür yamai rokongba angudang temulung raksar. Aseni meimba ka iba akümüli nungi pila aodang temulung zürepa tejashi tia ajurubaji kanga dang tasak aser iba tensa nia ajangshidanga lir asünung, taoba küm nungi kwinaka iba wara ajanga taküm samaogo par adianu aser kinunger tem asoshi ni aria bilemstür; aser asenok toktsür aoba asür tanela asoshi ni sarasademstür," ta Twitter sabang ajanga Rishabh-i lemsatop.

"Saisapong nung shilem agia arudang iba wadang nungi ni angazükba yimya tongtibangtiba kaji team ka ama 'longjemer' inyakba ya asütsü. Ajak ajangzüksü asoshi ka küma longjemer inyaksüji kanga tongtibang. Iba wara anema raratsü asoshi taküm bendanga agütsür inyaker 'frontline workers' nem ni tenüngsang

agütsür. Taoba küm India nung iba wara adoker külen nungi parnoki anibelem arema nübür tenzükogo. Ajisüaka, tang ama meimlaba tensa tamajung koktettsüsa, asenok ajak longjemer inyaksü nüngdaker," ta pai ashi.

"Senotsü tenla ka ajanga ni Hemkunt Foundation yaritsü nangzük aser iba tenla ajanga linük tesem balala nung iba tashidak agi shirangertem nem O2 cylinder den yipden aser Covid-relief kits tem alitsü asoshi nungittsü. Medical teyari agütsüba tentettem den longjemer inyaksü janrar. Iba den külemi, yimtsüing aser tanga tesem nung jila tulu ama medical kiojen peria maliba tesem nung medical teyari agütsütsü asoshi ni mapa inyaker," ta pai ashi.

"Tesem tezü ajunga nung Centre aser State Sorkar ajanga achaayangba COVID relief aser vaccination sentong tem indang osang aser iba wara nung tekümdangtsü sangoktsütsü atema, pei akokba yari tenlatsü aser pei teinyaksü shilem shitak inyaksü asoshi ajak dang ajungshir. Iba wara nungi kümzük alitsü asoshi tali küm dangshia alitsü, temzüing nung anidaksü aser akok tashi mapang shitak nung vaccine agiadoktsü asoshi mepishir," ta Rishabh-i shisem.

Maneni Rishabh Pant dak alaka, nüngtugu cricket asayar talisa Virat Kohli, Shikhar Dhawan, Hardik Pandya, Pat Cummins temi India Covid-19 wara anema raraba mapatong nung denogo.

Tim Seifert külem team pur den New Zealand-i motet

Bengaluru, Monupii/May 08, 2021 (Agencies): Kolkata Knight Riders (KKR) wicketkeeper-batsman Tim Seifert dak Covid-19 tashidak putetba sülen, Honibarnü India nungi New Zealand tashi aoba 'repatriation flight' (Sorkar ajanga acchayangba charter flight) nung pa külem team pur den motettsüsa kümogo.

Tim ayamesoa maodang PCR test anaben tashi nung positive puteta liasiü aser India nung pa quarantine süa amungtsü.

"BLACKCAPS batsman Tim Seifert dak COVID-19 tashidak putet aser pa külem teampur (Indian Premier League nung shilem agir New Zealand asayar, staff aser commentator tem) den iba charter flight nung New Zealand-i maotsü. Tim Seifert, shibai IPL nung Kolkata Knight Riders tenüing nungi asayaogo, 'pre-departure PCR test' ana tashi nung positive putet aser ibaji ajanga pa quarantine asütsü," ta New Zealand Cricket sangdong ajanga metetdaksü.

"New Zealand indang IPL contingent senzütsü renemba charter flight ana rongnung, tayimtsü kabo India nungi ayamesoa ogo aser mepetmesü kar adokba atema tayimtsü kaji nikongdang (NZ time) aotsü," ta kasa sangdong nung shia lir.

NZC chief executive David White-i ashiba agi, tesüiba anogo 10 nung Seifert dak tenetben tashi negative tendangtet aser franchise yagi junga anepalutsü teimla tulu liasiü.



Arishi küm 26 tain Tim ya Chennai-i anir aotsü aser Australia nung Michael Hussey anepalua aliba kasa nija mozüki ka nung pa amungtsü. Tan hopta tetenzüklen Hussey dak COVID-19 tashidak puteta iba mozüki nung mungdar.

"Tim kanga dang tia maka aser onoki akok tashi pa anepalutsü. Pa iba tashidak nungi yakta taneptsü ngur pei talidaki tanaben shilangtsü imlaa atar. Tim dak iba tashidak putetba osang angashir külen nungi pa yaritsü asoshi onoki franchise den longjemer. Kasa mapang onoki Tim'er adianutem den tongtepratepogo aser mapang shia parnok nem osang agütsütsü," ta NZC ajanga metetdaksü.

Maneni, BCCI sangdong tanga ka ajanga angazükba agi, Honibarnü Kolkata Knight Riders nungi fast bowler Prasad Krishna dak coronavirus positive putet aser pa talidak Bengaluru nung quarantine südar.

Arishi küm 25 tain Krishna,

shiba Hokolbarnü England tour atema stand-by asayar ama shima liasiü, Covid-19 tashidak puteter KKR asayar rongnung pa pezübuba alitsü.

"Prasidh dak COVID positive putet aser tang Bengaluru nung par kidang quarantine süa mungdar," ta BCCI sangdong nung shia lir.

KKR team nung iba tashidak positive puteta alirtemji Varun Chakravarthy, Sandeep Warrier aser Tim Seifert nung alitsü.

BCCI sangdong ajanga angazükba agi, training session mapang, Krishna aser Warrier naprongla Chakravarthy dak nungi iba tashidak mena liasiü. Krishna ya Chakravarthy'er tembar lir.

Taküm IPL 2021 asayamung, koba Deobar (02.05.2021) tashi league matches 29 asayaogo, franchise balala indang bio-bubble nung asayar kar dak Covid-19 positive putetba sülen, iba asayamung thinenja liasiü.

Hombarnü, Kolkata Knight Riders aser Royal Challengers Bangalore (RCB) tsüingda iba league match 30buba asayatsü renemer aliba mapang, Varun Chakravarthy aser Sandeep Warrier naprongla dak mezüing Covid-19 positive putet.

Mongolbarnü, Sunrisers Hyderabad (SRH) aser Mumbai Indians (MI) na tsüingda asayatsü ghonda ishika lia, Wriddhiman Saha (SRH) dak coronavirus positive putet. Ahmedabad nunga taoba mapang Delhi Capitals (DC) nungi spinner Wriddhiman dak Covid-19 positive tendangtet.

COVID-19 positive test... (Tapak 1 nungi...)

Talisa, Health Ministry indang official website nung aliba ama revised discharge policy sülen anidaksüla.

Honibarnep India nung nisung 4,01,078 dak COVID-19 aliba putetogo. Parnok züingsema nisung ajak agi 2,18,92,676 kümogo.

Tang India nung nisung lakh 37 tashi anepaludar aser crore 1.79 tema taneptsü nguogo. Nisung 4,187 asüba züingsema tasür ajak agi nisung lakh 2.38 kümogo.

Honibarnü Supreme Court-i state aser Union Territory tem

dangi oxygen yokba maparen ketdangtsüa repringtsü atema National Task Force (NTF) ka tentetogo.

Tanü Prime Minister Narendra Modi-ia Maharashtra Chief Minister Uddhav Thackeray, Himachal CM Jai Ram Thakur, MP CM Shivraj Chouhan aser Tamil Nadu CM MK Stalin nung den phone ajanga jembiogo.

Anogo ana jakdang nungi PM Modi-i state balala nung chief minister tem den COVID-19 tensa atema osang metetepelaa arur.

BILEMDANGANG

"Tetsü kaji chichiba temeim aser tesendaktep temaitsü lir."